

宋太宗实录

钱若水

文硕阁

wenshuoge.com

目录

关于我们

太宗皇帝实录卷第二十六

太宗皇帝实录卷第二十七

太宗皇帝实录卷第二十八

太宗皇帝实录卷第三十

太宗皇帝实录卷第四十三

太宗皇帝实录卷第七十九

太宗皇帝实录卷第八十

3

5

12

17

20

25

30

34

版权声明

本书版权保护已经过期，属于公版书！并由"文硕阁"网站的用户制作并发布于文硕阁 网站内,请大家在“合理使用”范围内使用

这本电子书可供中华人民共和国（the People's Republic of China）和世界上大多数其他地区的任何人免费使用，几乎没有任何限制。您可以根据本文件中包含的"传硕公版书许可条款"中的授权许可进行复制、赠送或改编它。

如果您不在中华人民共和国，您必须在使用本电子书之前查看您所在国家/地区的法律。

什么是公版书？

根据我国现行「著作权法」第 20、21 条的规定，除署名权、修改权、保护作品完整权外，中国公民对其著作的法定权利均于作者死亡后第五十年的 12 月 31 日截止。超过著作权法保护日期后，其作品就进入了公有领域（公共版权）

这种因作者死亡超过 50 年而丧失发行权、改编权等著作权利的书籍，就称为“公共版权书籍”，简称“公版书”。

传硕公版书保护计划

中华文明5000多年绵延不断、经久不衰，在长期演进过程中，形成了中国人看待世界、看待社会、看待人生的独特价值体系、文化内涵和精神品质，这是我们区别于其他国家和民族的根本特征，也铸就了中华民族博采众长的文化自信。

文化是一个国家、一个民族的灵魂。文化兴国运兴，文化强民族强。

所以我们发起了公版书保护计划。来帮助把中国五千年的文明硕果进行电子化并服务于大众，我们网站所有内容都是免费、自由、无版权的。对所有的读者免费！

使用 **文硕阁** 中的公版书 不需要获得许可（在中国，这属于“合理使用”）。这适用于所有用途，包括商业用途。换句话说，即使是商业盈利用途，也无需支付版税。

我们希望能有更多的用户加入到文硕阁网站中来，让我们一起来保护传承文明的硕果。

源浚者流长，根深者叶茂。文化自信是一个国家、一个民族发展中最基本、最深沉、最持久的力量。

如何联系我们？

网站：www.wenshuoge.com

邮箱：7sbook@duck.com



(扫码访问网站)



(扫码加客服微信)

太宗皇帝实录卷第二十六

起太平兴国八年六月，尽十月

六月乙酉朔，以给事中直学士院徐铉为右散骑常侍，以职方员外郎高继申为两浙诸州转运使。

丙戌，河南府言：“洛水涨五丈馀，坏巩县官寺、军垒，民庐舍殆尽。”左谏议大夫知开封府边珣卒。珣字待价，华州下邳人。父蔚，仕至太常卿。珣，天福六年举进士登第，解褐授秘书省秘书郎，直昭文馆，迁右补阙起居舍人，改库部职方员外郎，受诏知通州，以牢盆赋于民，大煮盐于郎山。岁得万馀石。国初，出为洛阳令，征为仓部郎中。陇、蜀平，命珣知三泉县，入为职方郎中。扬州言民盗杀广陵县尉谢图父，捕繫民凡三百日，狱未具，州以闻。命珣按之，尽得其实，民抵罪。开宝中，知扬州。会征江表，兼领淮南转运使。上即位，迁吏部郎中，岭南转运使，征为右谏议大夫，领吏部选事，移知开封府，至是卒，年六十三。珣强力有吏材，上方欲倚用，及闻其死，嗟叹者数四，赐其家绢百匹、钱二十万，以营葬事。

丁亥，以翰林学士、中书舍人李穆知开封府；膳部郎中、知杂滕中正为右谏议大夫、权御史中丞。吏部郎中许仲宣为左谏议大夫、依前岭南转运使；兵部郎中刘保勲为右谏议大夫；刑部郎中辛仲甫为右谏议大夫，依旧知益州。以库部员外郎杨徽之为刑部郎中，大理正孔承恭为库部员外郎，同考校京朝官殿最。

甲午，河南府言：“穀水、伊水、洛水、瀍水暴涨，溢出岸，坏官寺、军垒、寺观、祠庙、民庐舍万馀区，溺死者以万计。”

丁酉，诏曰：“自今京、朝官知录事参军及知县事者，见本郡长吏，用宾主之礼。宴集班位，其常参官在判官之上；未常参官在推官之上。所乘马，并不得用繁纓。违者，所在以闻，当行责罚。”

己亥，制曰：“汉以尚书平处奏议，魏以中书参掌机密。邦国之务，率繫于枢衡；军旅之谋，多出于帷幄。授受之际，厥惟难哉！宣徽南院使、兼枢密副使、金紫光禄大夫、检校司徒、上柱国、琅琊县开国男王显：器量恢宏，襟灵秀拔。常事藩邸，备极公忠，累践荣班，遂膺显用，风雨如晦，益励匪躬之诚，夙夜惟寅，愈挺致君之志，枢机之任，献替尤资，宜正名称，用伸毗倚；勉坚许国之节，式副知臣之明。可检校太保，充枢密使，进封本郡侯。”上召谓显曰：“卿代非儒门，少罹兵乱，必寡学问。今在朕左右，典掌万机，固无暇博览群书。”命左右取《军戒》三篇，赐显曰：“读此亦可免于面墙矣。”又以宣徽北院使柴禹锡为宣徽南院使，依前枢密副使；右谏议大夫王明为给事中，依前充盐铁使；左卫将军陈从信为本卫大将军，依前度支使。

潭州言：“长沙县民翟景鸿五世同居，内无异爨。”诏旌表门闾，常税外免其他役。

陕州言：“永定涧水涨溢出，岸坏民庐舍、军垒千馀区。”

丙午，乾宁军言：“御河水涨七尺五寸。”

戊申，新及第进士王世则以下十八人，送中书门下处分，馀并送流内铨，命文明殿学士李昉、枢密直学士张齐贤、王沔、中书舍人王祐，同于吏部注拟。上谓李昉等曰：“天下州县阙官，朕亲选多士，忘其饥渴，召见临问，以观其才，岂望拔十得五，但十得三四，亦岩穴无遗逸，朝廷多君子矣。朕每见布衣、搢绅间，有端雅为众所推举者，朕代其父母喜；或召拜近臣，必择良日，欲其保终吉也。朕于士大夫无所负矣。”昉等拜谢。

己酉，兖州言：“泰山父老并瑕丘等七县民陈延福等千四百九十三人，自言诣阙请封禅，遣观察判官廖文铎护送之。”

辛亥，赐枢密使王显开封府道德坊宅一区，赐宰相、文明、翰林、枢密直学士、中书舍人、节度、观察使建州所贡新茶。

秋七月甲寅，朔，工部侍郎致仕刘载卒。载，字德舆，范阳人唐节度使總之五代孙也。父昭，任颍州下蔡令。载，后唐清泰中举进士及第，解褐授秘书省校书郎，累迁左拾遗，集贤殿学士，改殿中侍御史。周显德中，历仓部员外郎、知制诰，擢拜右谏议大夫、给事中。国初，出知贝州。代还，奉使江表。复命知镇州，坐与兵马部署何继筠不协，为所构，太祖恶之，出为山南东道节度行军司马，仅十年。上即位，征赴阙，复为给事中，以老病乞骸，改工部侍郎致仕，仍赐一子出身。至是卒，年七十六。载颇刻励为学，博通史传，著吊战国赋万馀言，行于世。雅好释氏，佞佛甚谨，晚年专以蔬食、诵经为事。雅尚名节，颇为流辈所称。

戊午，泰山父老辞归故郡，各赐束帛以遣之。以新及第进士王世则等一十八人，并为大理评事、知县、录事参军，又以第二等进士吴铉为大理评事、史馆勘书。铉，余杭人，举进士，尝重定切韵。及上亲试，因捧以献。既中第，因令隶史馆，校定字书，故有是命。铉所定切韵，多以吴音，作俗字数千增之，鄙陋尤甚。寻礼部试贡士，为铉韵所误，有司以闻。诏尽索而毁之，永不得行用。

丁卯，制曰：“计功称代，则铭于旗常；尚齿优贤，则赐以几杖。我有旧老，时惟宗臣；愿追赤松之游，尽纳水衡之俸。不举殊典，何答元勲？开府仪同三司、检校太师、行右金吾卫上将军、判街仗司事、上柱国、邠国公王彦超：早拥节旄，亟更藩阃；许国之诚夙厉，临戎之绩素高。为列辟之楷模，实累朝之劳旧。缙骑二百，

宠以执金之权；宸居九重，聿成高枕之适。遽形表疏，愿避官荣，爰推进秩之恩，以遂悬车之请。优以廩给，表予眷懷。可太子太师致仕，仍依旧给右金吾卫上将军俸料。”

己巳，安化军节度使沈承礼卒。承礼，字正臣，吴兴人。钱鏐辟置幕下，摄处州刺史。鏐卒，子元瓘以其女妻之，署以牙校。及钱俶袭位，加承礼知威武军节度使。王师征江南，俶命承礼率所部助攻毗陵，平之；又攻润州，吴人夜窃出焚外栅，将帅皆欲驰救，承礼曰：“古人有言‘擊东南而备西北’者，此之谓也。”命士皆擐甲、蓐食、坚壁不动。他垒不设备者，悉惊忧，独承所部整肃，吴人不敢窥。既平丹阳，遂率兵抵建业。江南平，太祖录其功，特授威武军节度、福州管内观察处置等使。上即位，钱俶尽献浙右之地，以承礼为密州刺史、安化军节度使。至是卒，年六十七。诏辍视朝两日，赠太子太保，葬事官给。

辛未，制曰：“中书舍人、参知政事郭贄：簪笔持橐，获侍于初潜；曳组鸣珂，久尘于清切。顷参台席，实代天工。而后沃蔑闻，尸素斯极。饮酒过量，自贻沉湎之讥；发言无稽，益彰容易之态。所宜左降，尚屈典刑。可责授秘书少监。”

壬申，以左卫上将军向拱领左金吾街仗事，宥州刺史李继瑗为右清道率府副率。

庚辰，以左谏议大夫宋琪为刑部尚书，依前参知政事；文明殿学士、工部尚书李昉守本官、参知政事。

辛巳，诏：“开封府管内酸枣、阳武、封丘、长垣等四县民田为黄河水所害，及开封、浚仪、中牟、尉氏、襄邑、雍丘等六县民田为蔡河、广济、白沟河溢及水涝所损者，并蠲其租。”鄜州言：“河水涨溢入城，坏官寺、民庐舍四百馀区。”河南府言：“黄河水涨五丈七尺，坏河清县丰饶务仓库、军垒、民庐舍千馀区。”荆门军言：“长林县山水暴涨，坏民庐舍五十一区，凡五十六人溺死。”陕州言：“河水涨，断浮梁。”

壬午，免监察御史张巽，仍削四任，坐通判澶州日，纵部下馆驿吏擅费用官物而不举也。夔州言：“江水涨七尺。”乾宁军言：“御河水涨六尺。”襄州言：“汉水涨三丈二尺。”破虏军言：“滹沱河水涨一丈四尺。”祁州言：“资河水涨，溢入城，坏军垒、民庐舍百馀区。”沧州言：“葫芦河涨水八尺。”雄州言：“易水涨一丈三尺，坏民庐舍。”

癸未，驾幸含芳园，习射、张乐，赐从官饮。

八月戊子朔，以祠部郎中罗延吉兼侍御史知杂事。

辛卯，司天言：“寿星见丙地。”海门采珠场贡真珠二百二十八斤。

壬辰，制曰：“古先哲王，恭默思道。一物失所，在予之罪实深；四时不和，责躬之言尤切。今岁天降霖雨，自春徂秋，水出平原，河决近郡。下民离于昏垫，大田变于污莱。盖念尧、舜之功格天，不能逃阴阳之数；禹、汤之言罪已，所以致邦国之兴。朕端居九重，夕惕若厉，洁粢丰盛以恳祷，卑宫菲食以隐忧。至诚上通，和气来应。氛霾清霁，稼穡丰穰。取万箱而可期，食四釜而何远？宜伸肆眚之泽，答答乃眷之仁。应两京、诸道、州、府、军、监、县、镇繫囚，限德音到日，除十恶、官吏犯正枉法赃及谋杀、故杀、劫杀人外，其余罪无轻重，特与除放。诸处亡命军人，及聚山林为群盗者，限诏到一月，并许于所在陈首，限满不首，复罪如初。配流徒役人等，并具元罪犯以闻，别听进止。”

癸巳，诏曰：“桂州管内，先配民岁市沙糖；及茶园久荒，吏岁征其课；先以官牛给与民，岁取租，牛死而吏犹督其直；关市征常额外，增钱百八十贯文；并除之。官牛二百三十头，赋与贫民。”

丁酉，山后两林蛮王子牟昂等二百三十九人，以名马来贡。以右补阙、直史馆徐休复为职方员外郎，右赞善大夫苏易简为右拾遗，并加知制诰。诏曰：“朕选用群材，分领庶职。虽九品之贱，一命之微，未尝专委于有司；必须召对于便殿，亲与之语，以观其能。悦敷纳之可观，必越次而命赏。恩或由于侥幸，理未至于澄清。自今应亲临选擢官吏，并送中书，更审勘履历，别听进止。”辰州言：“溪、锦、叙、富等四州蛮求内附，输租税。”诏令州长吏察其徭俗情伪，并按视山川地形，具图来上。”

戊戌，以故永兴军节度使吴廷祚次子元晟为右卫将军、驸马都尉。徐州言：“清河涨一丈七尺，溢出堤，塞城三门以御之。”

庚戌制曰：“宥密之务，盖总于万机；师长之任，实参乎百揆。职事斯设，在劳逸而则殊；名器所先，固授受而惟允。枢密使、金紫光禄大夫、户部尚书、上柱国、乐陵郡侯石熙载：达识兼济，伟量旁通，早在初潜，实预寅佐。韦弦之诫，动静有常；金石之诚，夷险如一。自总钧轴，屡进谏言。方参帷幄之谋，遽婴寒暑之疾。抗章引退，沥恳弥坚。宜推加等之恩，即俟有瘳之喜。勉思颐养，式副倚毗。可尚书、右仆射。”先是，熙载以足疾假满，抗表解职，故有是命。

辛亥，诏增《周公谥法》五十五字：美谥七十一字为一百字，平谥七字为二十字，恶谥十七字为三十字。仍令翰林学士承旨扈蒙、中书舍人王祐同详定。蒙等奏议曰：“上所增五十五字，皆可用，其沈约、宋琛《续广谥》请停废。”诏从之。诏曰：“史氏之职，历代所先。政令之大小必书，人君之言动皆录。累朝多故，旧典阙如。策书所记言，殊为漏落。自今军国谋议，宰相与闻者，宜令工部尚书、参知政

事李昉撰录，每季终送史馆；枢密院公事，亦令副使一人，专知纂录，送付史氏。昉上言：“所修《时政记》每月先以奏御，后付所司。”从之。

壬子，诏曰：“先是，祠部给僧、尼牒，并传送诸处，州长吏亲给，如闻吏为奸，募人以缗钱市取，賫以至外郡卖焉，得善价，即付与之。自今所在，宜奉行前诏，违者重致其罪。”

九月癸丑朔，以洛苑使王寅领潭州刺史，与儒州刺史许昌裔同知水路发运。军器库使、顺州刺史王继升、驾部员外郎刘蟠同知陆路发运。先是，每岁运江、淮米四五百万斛以给京师，率用官钱僦牵船役夫，颇为劳优。至是，每艘计其直，给与舟人，俾其自召募，甚以为便。而舟数百艘，留河津，月馀不得去。上遣期门卒侦之，计吏自言有司除常载外，别科买羊皮、赤堇、铅锡、苏木等物，守藏者不即受故也。上怒，夺三司使一月俸，分命王寅等领水、陆发运。自是，贡输无滞矣。以国子监主簿杨文举为国子监丞、史馆遍修。宿州言：“濉河水涨溢，寢民田六十里。”秘书监钱昱献《太平兴国录》一卷。

戊午，诏曰：“近年已来，河堤频决，坏庐舍，害田畝，数郡被其害。先是，筑遥堤以遏水势，民利其膏沃，多种蓺、居处于其中。河涨，即罹其患。宜令殿中侍御史柴成务、国子监丞赵孚、供奉官万彦恭殿直郭载，分往河南、北岸，按行遥堤，有不完善处，发丁男治之。民先占堤内种植者，免其税，迁于善地焉。”御制《晚秋五》、七言诗二首，赐近臣。

甲子，诏曰：“临淮、寿春浮梁，先禁马高五尺已上，不得渡淮。今江、浙已平，吏犹守旧法，宜除之。”

乙丑，诏曰：“国家敦本厚生，取什一之税，丰财足用，聚九年之储，兵食所资，盖不得已。尚念力耕数耘之苦，祁寒暑雨之劳，供王租而既勤，获地利而甚薄。先是，两税起征，特设三限，限外又加一月。州县吏苟务苛虐，罔守章程，施鞭朴以立威，用掊克而为政。不体勤恤之意，自求课最之名。昔之良吏，善治民者，有增租从调、减年就役之事，岂若是乎？自今宜令诸州长吏、本判官、录事参军，专察所属县令、主簿政治善恶，书于吏部南曹历子外，以其状闻。当申黜陟，用彰朕爱民之旨焉。”先是，上谓宰相曰：“朕视万民如赤子，念其耕稼之勤，春秋赋租、军国用度所出，恨未能去之。此令三限外特加一月，而官吏不体朝旨，自求课最，恣行捶楚，以求办事。此一事尤伤和气，宜下令申儆之。”故有是命。

丙寅，诏曰：“荆湖、江浙、淮南诸州，每岁上供钱帛，遣部民之高赀者护送至阙下，非便。自今直遣牙校，勿复优民。”先是，上谓宰相曰：“诸州于部内择高赀户，部送官物，民家人质鲁，无御下之术。篙工、楫师，皆顽猾不逞辈，侵盗官物，恣为不法，民家多破产偿之，甚无谓也。”故有是诏。授山后两林蛮王弟牟昂懷

化大将军，首领王子牟盖、磨忙、卑块并授归德郎将，副使牟计等一百二十人并授懷化司戈。

丁卯，海州言：“州城内东山坡先废佛牙寺真身塔，相传言隋末土人于岩崖间闻诵经声，一日，天大雨，崖崩，土人共见桑门坐于崖下，逼而视之，肤貌如生人，但气息已绝，因立塔庙祠之。显德中，诏毁废佛寺，而桑门真身独存。开宝初，节度使张铎亲祷之，有神光之异。铎欲迁于城东，天大雨雹，不果迁而止。州民列状，愿复筑宫祠之。”诏从其请，仍赐号圣因院。交州黎桓遣使贡方物。

己巳，以军器库使王继升为左神武将军，依前领顺州刺史；洛苑使王賓为右神武将军，依前领演州刺史。

庚午，吐蕃戎人以名马来贡，召见其酋长于崇政殿。因谓宰相曰：“蕃戎言语不通，衣服异制，朕常以禽兽畜之。自唐已来，颇为边患。以国家兵力，聊举偏师，即可驱于数千里外。但念其种族蕃炽，各安其土，悦尽驱之，必恣杀戮，所以置于度外，存而勿论也。”各赐酋长束帛，以慰抚之。

癸酉，诏曰：“广州岁贡藤，每斤去皴粗外，中用者才三两；大通治歲输铁尚方，铸兵器，锻链外，十才得其四五。自今岭南贡藤，取其堪用者；大通治输铁，先铸成器，俾官工淬治之，无使负重致远，匮民力焉。”

丙子，占城献驯象，能拜伏，诏養于宁陵县。

丁丑，以河决未塞，命枢密直学士张齐贤乘传诣白马津，以太牢沉祠，加以璧。太平军言：“飓风拔木，坏官寺、民舍一千八百十七区。”海门采珠场贡真珠一百二十斤。

冬十月，甲申，诏征侍卫马军都指挥使、定州兵马部署米信赴阙。以新译经五卷示宰相，因谓之曰：“浮屠氏之教，有裨政治，而梁武舍身为寺家奴，布髮于地，令桑门践之，此真大惑，朕甚不取也。先是，胡僧自西域赍贝多叶经至，朕因令以华语译之，殆百餘卷。虽小道，亦有可观，卿等试之。盖存其教耳，非溺于释氏者也。”以西天竺中印土译经三藏僧法护为明法大师。

戊子，诏：“祀土德于黄帝坛，圭、币、牢具如大祠制，裨祠官领之。”

己丑，乾明节，群臣上寿。越州以王羲之画像并其石砚来献。

庚寅，诏赐诸军校百夫长已上建州茶有差，并赐诸营卒翦草茶各一斤。

丁酉，宴中书门下、翰林学士、枢密直学士、文武常参官、节度、观察、防御、团练使、刺史、诸军校百夫长已上、诸州进奉使、外国蕃客于大明殿。

戊戌，命西八作坊使张璇知房州。诏：“皇长子卫王德崇改名元佐，第二子广平郡王德明改名元佑，第三子德昌〈真宗旧名〉改名，第四子德严改名元隼，第五子德和改名元杰。皇侄孙文雍改名惟吉，文治改名惟正，文起改名惟忠，文晟改名惟贞。”

己酉，制曰：“入總国政，实冠三司之崇；出分阃寄，聿当二老之任。所以推恩礼于辅弼，伸倚注于勲贤。斯为大猷，岂敢虚授？开府仪同三司、守司徒、兼侍中、昭文馆大学士、梁国公赵普：挺锺间气，富稟谋明。草昧之初，締构之功克著；岩廊之上，启沃之效居多。朕畴咨老成，参用旧德，再授盐梅之寄，用师藥石之言。弥缝之绩既彰，调燮之勤期著。烦我耆艾，职兹枢衡；授以蕃宣，均其劳逸。用加掌武之秩，以增卫社之雄；大启南阳，夹辅王室。可检校太尉、兼侍中、行邓州刺史、武胜军节度使。”是日，制以皇长子卫王元佐进封楚王，第二子广平郡王元佑进封陈王，第三子〈真宗旧名〉、第四子元隼、第五子元杰，并授特进、检校太保、同中书门下平章事、上柱国。〈真宗旧名〉封韩王，元隼封冀王，元杰封益王。以保静军节度使刘遇为滑州刺史、武成军节度使。

太宗皇帝实录卷第二十七

起太平兴国八年十一月，尽十二月

十一月壬子，朔，制曰：“平章百姓，唐尧所以畴咨；總领众职，汉宣由是致。治非贤罔乂，得士则昌。聿求经济之才，授以弼谐之任。枚卜斯允，成命以行。刑部尚书、参知政事宋琪：宇量冲深，规模宏远；工部尚书、参知政事李昉：郁有公望，久服大僚。而皆罄竭谟明，裨赞枢轴。君臣之际，人无间言；公家之事，行有馀力。修经术以自辅，体方直而靡渝。是宜擢正台衡，职兹调燮。朕所注意，不假审象之求；汝既致君，更思补衮之效。唯用尽己，伫兹沃心；钦若训词，往践乃位。并守本官，同中书门下平章事，加金紫光禄大夫。”琪封广平侯郡、侯昉封陇西郡侯。以皇侄孙惟吉为左监门卫将军，封平阳郡侯；惟正为左千牛卫将军；惟忠、惟贞并为右千牛衛将军。

癸丑，诏曰：“先是，开宝二年八月丁亥诏书：‘应广南东西、川、峡路诸州民，祖父母、父母在，子孙别籍异财者，弃市。’自今并除之，论如律。”泗州言：“僧伽塔白昼有光，民燃顶及焚指、斷臂者数千人，更不能禁。”

甲寅，诏曰：“并建子弟，以藩屏王室；申命相辅，以羽翼公朝。旧邸之任虽崇，钧台之寄尤重。聿分内外，须正等威。自今宰相序立，宜在亲王之上。”刑部尚书、平章事臣琪，工部尚书、平章事臣昉等顿首言：“钧衡之任，止曰台司；盘维之封，实承天绪。汉法：丞相在诸侯王之下；唐制：元子非百执事之列。典故昭晰，载在策书。伏望圣慈，俯遵前軌。上不允，琪等又叩头，固让久之。上曰：“宰相之任，实總百揆，与群官礼绝。藩邸之设，止奉朝请而已。元佐等尚幼，欲其知谦损之道，卿无至固让也。”琪等拜舞称谢。

戊午，高阳关捕得契丹生口，送至阙下。召见，言契丹种族携贰，恐王师讨伐，于近塞筑城为备。上谓宰相曰：“戎虏以剽掠为事，乃修城垒，为自全之计，盖天亡之时也。往者刘继元盗据汾、晋，周世宗及太祖皆亲征不利，朕决取之，除心腹之患，为世宗、太祖刷耻，擒刘继元致阙下。今日视之，犹机上肉耳。当其保坚城，结北虏为援，岂易制乎！”宋琪对曰：“臣少陷虏庭，备知戎马之数。自晋末始强盛，然种族蕃多，其心不一。自石岭关之败，平刘继元，三交、高阳关及沿边诸郡，频有克捷。以臣度之，其部下携贰必多，国家不须致讨，可坐待其灭也。”

己未，御制《莲花心轮回文偈颂》十部，共二百五十卷，回文图十轴，以示宰相、近臣。城南太一宫成，命枢密直学士张齐贤、司天春官正楚芝，兰祠五福太一。齐贤等上言：“太一，五帝之佐，天神之至贵者也，请用祀天之礼。杀其半，又小损之。”上令增教坊伶官百人，自昏祠至明，如汉祀之制。

丙寅，楚王元佐等五王同赴中书视事。西八作使郝守浚责授慈州团练副使，坐护塞河决，愆无状也。

丁卯，宴近臣于长春殿，饯武胜军节度使赵普、武成军节度使刘遇，赴镇也。上赐普诗，普捧而泣，曰：“陛下赐臣诗，当刻于石，与臣朽骨同葬泉下。”上亦为之动容，宴罢，谓近臣曰：“赵普于国家有大力，朕布素时与之游从，今齿髮衰矣，不欲烦以枢务。择善地，俾之卧理，因诗什以导意。普感极且泣，朕亦为之堕睫。君臣之际，亦尽善矣。”时枢密使王显等侧待，频视上袴，上怪而问之。显等曰：“陛下所衣袴文缕侧倒。”上笑谓曰：“朕未尝御新衣，盖浣濯频所致耳。”上因言：“此逼下已。”为冀王府翊善，著作佐郎姚坦为益王府翊善。

己卯，诏江南、两浙、剑南、东西川、峡路、岭南、河东，知州、通判、知军、知县及监掌庶务官等，自今满三考，并与移替。

庚辰，诏“史馆所修《太平总类》一千卷，宜令日进三卷，朕当亲覽焉，自十二月一日为始。”宰相宋琪等言曰：“天寒景短，日阅三卷，恐圣躬罢倦。”上曰：“朕性喜读书，颇得其趣，开卷有益，岂徒然也。因知好学者读万卷书，非虚语耳。”以著作佐郎吕文仲为翰林侍读，赐绯鱼袋。

辛巳，以郴州刺史孙方进为右领军卫将军。

十二月壬午朔，诏曰：“绥、银、夏等州，民多流亡入蕃部，宜令州县吏设法招诱，俾之复业，仍给复三年。”

丁亥，诏：“自京至广州传〔置〕卒，月别给百钱；河北、河东道沿边戍卒，人赐黄娟襦一，絮以绵；京城内外诸军卒，人给米一石。”淮海国王钱俶上言曰：“臣以蕞尔之躯，蒙被恩宠，赋禄百万，兼职数四。元帅之任，实本于兵柄；国王之号，盖屏于王室。尚书则總百揆之重，中书则掌八柄之繁。维师冠于上台，开府聿当于极品。臣之眇末，罔克负荷。邦国之制，式著典常。名器之间，固有涯分。徒速罪戾，以取颠挤。伏望圣恩，特从省罢。”优诏不允，表三上，降制曰：“分茅胙土，所以彰世及之荣；大路繁缨，所以表器数之重。至若褒宠勲旧，度越典常；曲阜肇分，得用六代之樂；平墓光启，许载九旂之旗。咨于旧章，爰推异数。乃有体好谦之德，形固让之辞。三扣帝阍，确乎不拔。用屈至公之论，式光知止之风。天下兵马大元帅、开府仪同三司、守太师、尚书令、兼中书令、淮海国王、食邑八万户、赐劔履上殿、诏书不名钱俶：方岳炳灵，风云玄感。奄有勾吴之地，不忘象魏之心。挈族来朝，举宗宿卫；尽以版籍，入于朝廷。爰分宝玉，胙之淮海，居天子二老之任，后真王万室之封。并加宠名，用答忠顺。而乃固形表疏，愿避官荣。谕之再三，诚不可夺。若以灵台偃伯，武库囊兵，天下一，家书軌之无外；五侯九伯，征伐之不行。愿寝元帅之名，勉徇由衷之请。其乃世祚，明德存于带砺之盟；帝

賚良弼，宠以钧台之任。维师之秩，馭贵之阶，非是懋功，适以昭德。勉膺渥泽，克副乃懷。仍加食采之封，载光书社之数。可依前守太师、尚书令、兼中书令、淮海国王，加食邑三千户。”

庚子，诏曰：“史馆新纂《太平总类》一千卷，包括群书，指掌千古，颇资乙夜之覽，何止名山之藏。用锡嘉称，以传来裔，可改名《太平御覽》。”

癸卯，滑州言：“河决已塞。”群臣称贺。

甲辰，诏曰：“朝廷比设贡举，以待贤材，如闻缁褐之流，多弃释、老之业，反袭褒博，来窃科名。自今贡举人内有曾为僧、道者，并须禁断。其进士、举人，只务雕刻之工，罕有通经素之学，不晓经义，何以官人？自今宜令礼部贡院，特免帖经，只试墨义二十道，较其能否，以定黜陟。其诸科举人，于本业外，别试法书、墨义十道，著为定制。”

乙巳，以著作郎李沆直史馆。

丙午，右补阙直史馆胡旦献《河平颂》曰：“巨宋受命，二十有五载，夏五月，河决于滑，示灾也；冬十有二月，塞之，明功也。古之王者，必有大患，然后彰大圣；必有大灾，然后成大〔功〕（成）。故尧之水，汤之旱，太宗之蝗，玄宗之彗，皆所以彰灾患而成圣功也。当尧之时，三苗未〔诛〕（举），四凶未除，天示大水，以涤群凶。汤之时，夏政未釐，商民未熙，天示大旱，以烁浇风。太宗之时，餘寇未平，大政未成，天示其蝗，以啖万物之豐。玄宗之时，群贤未集，大礼未立，天示其彗，以扫万国之雄。则患息而启圣，灾平而著功，斯亦我宋之大道，圣绩之无穷也。太平兴国，纪号之始，在国家经营克复之际，蛮戎夷狄，罔不来格；禘祠烝尝，罔不克备。文教被于内，武德焕其外。天子凝旒以示化，宰相备位以充职。而奸生治平，衅发无事。贼臣多逊，阴泄大政与孽弟廷美，詖沮不道，衷构大难。赖天地社稷之福，圣皇之灵，觉而黜之。时又强臣普，恃功贪天，违理背正，削废大典，构豪杰之罪，饰帝王之非；榛贤士之路，使恩不大賚，泽不广洽。越八年，夏河拥积石，溃龙门，荡砥柱，泊大伾。高峰为羈，长岸为桎，怒无所作，水潦群汹，大决于滑；漂澶荡濮，浮曹沈济，灌于彭门，注于淮泗；孟诸巨浸，漫漫而海。兽无攸处，鸟无攸居，况于人民乎？况于州邑乎？群臣僉言，筑防以为捍。帝曰：‘非是也。百姓不亲，五品不训，司徒之过也。敷奏不以言，明试不以功，侍中之咎也。壅其下而不闻于上，蔽其贤而不进于位，宰相之罪也。汉家法制，以灾异责三公。’申命有司，明举旧典，即谴普于邓，假节为帅，示优恩也。乃命内客省使郭守文、督内谒者、中常侍暨廷臣受旨者，凡数十百人；役兵籍民，凡三十万；竹木、土石之数，不可胜计。以某月日经始，至某日毕功。自始至毕，皆骑置成算以授之，莫不鳩大功，集巨力，如坻如阜，如山如岗。衣土以薪，实舟以石，沈之筑之，是壅是塞；涛回浪转，川动雷骇，截洪流之迅奔，归故道以长往。巨岸山峙

，巨防岳立，大灾以宁，大功以成。是月癸卯，使者驰以奏。甲辰，平章事臣琪、臣昉、参知政事臣穆、臣蒙正、臣至，与将军、大夫、郎中、博士再拜称贺，上言曰：‘玄天降灵，大河已平，圣功巍巍，子孙相承，斯为陛下之德也。’小臣职在史氏，位司谏列，岂不以天祐圣宋，方鸠大功，大功无所发，必有大灾；旱不能有，蝗不能生，彗不能见，必有大水，与尧同休。是天子前黜多逊，后谴臣普，防大患而遏大灾也。塞洪河之决，疏德泽之壅，彰大圣而成大功也。功已立而不宣，儒臣之罪也。宜其发颂声、褒形容，以明万万之休烈。臣且不敏不明，谨献颂，曰：‘天祚我宋，以君兆民。配天承休，惟尧与邻。粤有大水，昏垫下人。非曰圣祚，孰究孰度？蔽贤者退，壅泽者罪，我防大患，河岂云败。逆逊逖投，奸普屏外。圣道如堤，崇崇海内。帝曰守文，是塞是亲。调尔卫兵，程尔烝民。民以尽力，臣以勤职。役云其终，河以之塞。唐尧懷山，实警神德。汉武宣防，实彰令德。我塞长河，融流惠泽。明明圣功，万代成则！’”上览之震怒，召宰相谓曰：“胡旦所献颂，词意悖戾，朕自擢于甲科，历试外任，所至无善状。知海州日，为部下所讼，狱已具，适会大赦，朕录其材而舍其罪。尚令在近列，又领史职，乃敢自恣凶臆，狂躁如此。今朝多君子，如此人岂宜尚列于侍从耶？亟逐去之！”宜以其颂下史馆，中书舍人、史馆修撰王祐等奏议曰：“胡旦幸以常材，谬登上第，职在史氏，身列谏垣，而乃献颂明廷，发泄私愤，谤讟圣代，指斥大臣。躁人词多，前典尤戒；下流讪上，先儒所恶。宜加窜逐，以肃缙绅。”

丁未，诏曰：“右补阙、直史馆胡旦：猥以庸琐，谬升科级，兼领太史，为吾近臣。顷以江、淮漕运，俾司其事，赏赐甚厚，恩奖备至。年少气锐，所为不法。朕思欲全度，尽与洗涤。俾领东海，欲其自新。而乃沉湎于酒，恣行鞭扑，妄奏部下吏课最，以图侥幸；增置胥吏，侵用官钱。丑迹升闻，逮捕繫狱，证左已具，适会大赦。朕犹示含垢之道，未行黜幽之典。俾在禁掖，司吾策书，乃敢献颂阙廷，谤讟公辅，词意狂悖，莫甚于兹。人之无良，唯曰不足；言之不善，虽逖必违。岂可寘于周行，所宜投诸四裔。尚通朝，俾隶方州。我非无恩，汝宜自省。可守殿中丞、充商州团练副使，依分司官例，支給半俸，仍不得签署州事。”

戊申，上于禁中读书，自巳至申始罢。有苍鹤自上始开卷飞上殿吻，殆掩卷而去。上怪之，以语近臣，对曰：“此上好学之所感也，昔扬震方讲间，有观雀啗三鳢鱼堕于庭，亦同其应。”宥州言：“戎人二万众入寇，巡检李询率所部蕃汉卒擊走之，斩首二千级。”

己酉，诏曰：“先是，禁民于沿边诸郡私市马。戎人卖官马，市良而弃弩，又禁民不得私市。往来死于道者甚众，戎人少利，国马无以充旧贯。自今边郡吏，谨视马之良弩者，刻毛以记，许民私市，庶羌戎获利，而歲驱马通关市，有以补戰骑之阙焉。”福州言：“先是，钱铜兼用，铁钱三直铜钱之一。吏受赇、盗用官物，参以铜、铁钱，计其赃差重，自今望悉以铜钱定其罪。”从之。以懿州刺史田汉琼为锦州刺史，锦州刺史田汉希为懿州刺史，皆五溪之酋帅，愿易其地，因而授之也。

庚戌，赐左谏议大夫、参知政事吕蒙正丽景门宅，右谏议大夫、签署枢密院事张齐贤宜秋门宅，王沔崇德坊宅，各一区。雷州言：“飓风飘坏官寺、仓库、民庐舍七百区。”

太宗皇帝实录卷第二十八

起太平兴国九年正月，尽二月

壬子，朔，上不受朝，群臣诣阁，拜表称贺。

丙辰，命户部推官、监察御史索湘、元玘按行河决所坏民田。

丁巳，驾幸景龙门外水碓，上临水而坐，命近臣观之，因谓近臣曰：‘此水出于山源，清澄甘洁，近河之地，水味皆甘，岂河涧所及乎？’宋琪等对曰：‘亦犹人性善恶，染习使然也。’上曰：‘卿言是也。’回，习射于后园，上中的者五。张乐，赐从官饮。

戊午，右仆射石熙载薨。熙载，字凝绩，洛阳人也。周显德中，以进士登第。在布衣时，磊落有度量，人皆重之。家贫，事后母以孝闻，治家严谨，闺门肃然。国初，上为殿前都虞候、领泰宁军节度，辟为掌书记。及上领开封尹，表为推官，历右拾遗，迁左补阙，出为崇义军掌书记。及上即位，召归，复为左补阙，出知潭州，征还，擢为兵部员外郎，充枢密直学士，旋签署枢密院事。车驾征河东，从至镇州，拜给事中，充枢密副使。还京，迁刑部侍郎副使如故。未几，授户部尚书、枢密使，以足疾，步履蹇涩多请告。上幸其第，临问太医，诊视久之未愈，乃抗表求解所职。优诏许之。拜右仆射。至是，薨，年五十七。上闻之，亟幸其第，临丧涕泗，诏辍视朝两日，赠侍中官，给葬事。上悲叹者累日，顾谓侍臣曰：‘熙载事君之心，可谓纯正无他矣。方将委用，而遽至此，岂命乎？’熙载有文学，性忠实，遇事尽言是非，好恶无所顾避，人有善必推荐之，时论称其长者。

己未，以元帅府掌书记黄夷简为淮海国王府判官，元帅府支使慎知礼为淮海国王府掌书记，元帅府别驾裴祚为淮海国王府支使。以钱俶解元帅之任故也。

庚申，国子博士鹿峭以母老，拜章求解官就养，从之。以国子博士韩宝为峡路转运副使。徐州丰县主簿李蒙正、县封张思问，并削籍为民，部下犯赃故也。蒙正配隶商州禁锢。

壬戌，诏曰：‘国家勤求古道，启迪化源。国典朝章，咸从振举；遗编坠简，盖在询求。致理之先，无以加此。宜令三馆所有书籍，以《开元四部》书目比校，据见阙者，特行搜访。仍具录所少书，告示中外。若臣僚之家有三馆阙书，许诣馆进纳。及三百卷已上者，与一子出身；不及三百卷者，据卷帙优给金帛。如不愿纳官者，借本缮写；写毕却以付之。’先是，上谓侍臣曰：‘夫教化之本，治乱之源，若非书籍，何以取法？今三馆贮书，数虽不少，若观《开元书目》，即遗逸尚多，宜

在广行求访’，乃下是诏。以右卫大将军李从谦知随州。

癸亥，命右神武将军胡公霸督理汴河堤。

甲子，有司言有以窃盗计赃至死者，特诏贷之。因谓宰相曰：‘朕常重惜人命，如此类者，往往贷其极刑。但时于其中，取其甚者以警众多耳。不欲小人知宽贷之意，恐其犯法者众。’

乙丑，上元节，上御丹凤楼观灯，见士庶阗咽，谓宰相曰：‘国家乘五代干戈之后，朕孜孜求理，惟望上天垂祐，福此生民。今天下阜安，京师繁盛，甚以为慰。朕居常罕饮酒，今夜与卿等同乐，宜各尽醉。’于是，每举酒，以虚爵示群臣。

丙寅，月有食之既。

丁卯，房州上言涪陵县公廷美卒。上闻之震悼，乃降诏曰：‘涪陵县公廷美，朕之同气也。为奸臣所惑，溺于邪说，朕以宗社之故，迫于公议，房陵之谪，不得不然。永惟骨肉之亲，绝而不殊，方欲削平前事，复我旧恩，忽尔沦谢，有志不果，痛悼之极，其何可言？宜追封为涪陵王，辍视朝五日。仍赐谥曰“悼”。所司择日册命。’廷美，宣祖第四子也。建隆元年，出阁领嘉州防御使，迁兴元尹、山南西道节度使，封天水郡侯，进封郡公。乾德二年，加同平章事。开宝六年，加侍中京兆尹、永兴军节度使。上即位，加中书令、开封尹，封齐王。从平太原，进封秦王，开封尹如故。七年，出为河南尹、西京留守，坐与宰相卢多逊交通群臣，议请寘于法，上以至亲不忍，止令就第。未几，黜为涪陵县公，迁房州安置。因忧患成疾，至是卒。上闻之，呜咽流涕，悲不自胜，谓宰相曰：‘廷美自少刚愎，及长而凶恶如此，朕以同气至亲，不忍置之于法，俾居房陵，冀其思过，中心悯之，未尝暂忘。方欲推恩，与之复旧，遽兹殒逝，痛伤奈何？’后因从容言及廷美‘朕乳母陈国夫人耿氏所生，耿氏后出嫁赵氏，生供奉官赵延俊，即廷美之同母弟也。朕待延俊固无猜忌，常令属鞬侍左右，而延俊以同母之故，颇泄禁中事于廷美。顷者方营西池，而桥梁未备，朕将欲泛舟于池中，廷美与左右谋，欲以此时窃发。谋若不果即，廷美诈称疾于邸俟。车驾临幸，即为他变，有以是谋来告者。当时若令有司穷究，则廷美罪不容诛。朕以天伦之爱，不欲暴扬其丑，及与多逊连谋，即命居守西洛。而廷美犹不悔过，益怨望言不逊。始命迁房陵以全宥之。朕于廷美，固无所负。’李昉对曰：‘涪陵悖逆，天下共闻。而宫禁中事，若非陛下委曲宣示，臣等何由知之？’

戊辰，命左领军卫将军苏海等六人分往诸郡，督修河之役。

辛未，诏曰：‘朕每恤烝民，务均舆赋。或有哭沴，即与蠲除。盖欲惠贫下之民，岂复以多少为限？自今，诸州民诉水旱二十畝以下者，皆令检勘。’先是澶州上言

，民诉水旱二十畝以下，请不在检视之限。上以贫民当恤之故，有是诏。

壬申，诏诸道、州、府去年官所贷粟，并除之。

癸酉，上为涪陵王廷美发哀于别殿，群臣诣崇政门奉慰。左谏议大夫、参知政事李穆卒。穆，字孟雍，开封阳武人也。与弟肃皆中进士第，释褐授郢州军事推官，迁汝州防御判官。未几，拜右拾遗殿中侍御史，通判洋州，移陕州。诏以郡中租输洛邑不即，应命坐免官。肃时为博州从事，穆迎其母就肃，居家贫，簞瓢自乐，兄弟怡怡如也。自是，优游经史间，殆无仕进意。久之，征为太子中允。逾年，拜左拾遗知制诰，书命典雅，有元和之遗风。穆与参知政事卢多逊同门生，太祖尝谓多逊曰：‘穆，士大夫之中仁善者，词学之外，他无所预。’多逊曰：‘穆虽若是，然操行端直，临事不以生死易节，所谓仁而有勇者也。’时太祖方图取江南，已部分诸将，而未有发兵之端，求所以使江南召李煜入朝者，以为履不测之险，难其人。由是，太祖谓多逊曰：‘若如尔言，无以易穆。’遂遣之。穆至金陵，谕以朝旨，煜辞以疾，且言‘上事大朝者，以其望全济之恩，今若此有死而已’。穆曰：‘朝与否，惟国主自处之。然大朝兵甲精锐，万物繁富，恐不易当其锋，宜孰思之，无使后悔。’及还，具言其状。

太祖以谓所谕要切，而江南亦谓所言诚实。后煜归朝获全宥者，亦穆之力也。

上即位，改左补阙知制诰如故，寻充史馆修撰，判馆事。上征并汾还，征拜中书舍人文学履行，益为上所知。卢多逊之得罪也，以其情分款洽，责授司封员外郎。明年春，盗，捕之经时不获，上欲必得之，令原其罪购赏，果有告者，乃军人数辈结约，夜逾垒垣而出，尽获而戮之。因遍索军中，累有罪犯凶恶无赖者，得数百余人，不忍杀，以铁钳钳其颈，羈于本军。至是并释之，仍各赐钱三千。

太宗皇帝实录卷第三十

起太平兴国九年五月，尽七月

五月庚戌朔，上御乾元殿受朝贺。

辛亥，车驾出南薰门，观稼，召从官列坐于田中，令民刈麦，咸赐以钱帛。回，幸玉津园，观鱼、张乐、习射。久之，宴饮，极欢而罢。

壬子，西州回鹘与波斯外道来朝贡。西州婆罗门僧永世自云：“本国名‘利得’，国王姓‘牙罗五得’，名‘阿诺你绲’，衣黄衣，冠金冠，以七宝饰之。每出，乘肩舆，或乘象、马，以音乐铎钹前导。多游佛寺，博施贫乏。妃‘摩诃你尾’，衣大袖缕金红衣，歳一出，多振施。人有冤抑，俟王及妃出，即随之申诉。置宰相四员，国中庶务、库藏，皆宰相裁制之。五穀、六畜、果实与中国无异，市易用铜钱，其钱有文缦，大如中国所用者，但无穿耳。东至大食国六月程，又东至西州二月程，又东至夏州三月程。”波斯外道阿里嫫自云：“本国王号‘黑衣王子’，姓‘张’名‘咄里没似’，衣锦彩衣，好乘马游猎，每出二月，至三日即还，委大臣九人，同理国事。男子以白氍毹布为衣，妇人豪富者衣锦绮，贫下者止服绛布。种陆田，无稻秣，土产丝、蚕、羊马、果实。无钱货，以杂物相贸易。东至婆罗门六月程，又东至大食国六月程，又东至夏州二月程。”

癸丑，以西京作坊使、顺州刺史李克文起复云麾将军、麟州防御使，依旧知夏州事。诏银州、宥州复隶夏州。

戊午，诏曰：“国家钦恤刑章，重惜人命，岂容酷吏，恣为深文？掠治无辜，致其殒绝，损伤和气，莫甚于斯！凤翔司理参军杨勣、许州司理参军张睿，并掠囚至死，已从私罪决遣。讫今后犯者，并以私罪罪之。”先是，勣、睿各无辜考掠人至死，法寺定为公罪，上怒，故有是诏。

甲子，以左神武大将军吴元辅领平州刺史，以监察御史宋瑋为陕西转运使。

乙丑，诏曰：“司理参军，专于推鞠，研核情实，尤在得人。如闻诸道，多阙此官，盖吏部拘以资叙，难为注拟。自今应有阙处，宜令本州于见任、前任簿尉判司内，选择明敏有官业者充。秩满当与陞奖，其罢软不任职者，便可选官代之。”先是，诸处多阙此官，而吏部以资叙相妨，难于注拟。上以庶狱为重，不可暂阙，故委本部选择焉。

庚午，以东上阁门使田仁朗判四方馆事。

辛未，以左拾遗、直史馆宋準守本官知制诰。

壬申，归州刺史高继元卒。继元字若虚，中书令、南平王保融之第二子也。保融承祖、父业，据有荆南，事具五代史。及保融卒，弟保勗立；保勗卒，保融子继冲立。建隆四年，朗州周保权以部内将衡州刺史张文表叛，求救于朝。太祖遣山南东道节度使慕容钊帅师援之。假道于荆南，继冲不敢拒之。师既入城，继冲乃举其地内〔属〕（有）而入觐焉。继元，即继冲弟也。继冲卒后，授继元归州刺史。

上亲征太原，命继元京师巡检。

车驾还京，以继元为河阴兵马都监。至是卒，年三十一。

丙子，以判四方馆事田仁朗自京至泰山，督治道之役。

丁丑，乾元、文明二正殿灾。是日既夕，阴云四合，风雷暴作。夜漏初上，澍雨如倾，雷电震激，火发自月华门，抱关者不之觉。延烧渐北，烟焰上出。上遣小黄门开关视，火势已盛，亟命宿卫数百人，毁回廊连屋。比明，役士皆至，并力救之，至辰巳乃息。

己卯，以柳州团练使田钦祚为郢州团练使。知夏州、著作佐郎杜凝除籍为民，以其知道州日居丧聴乐，为人所诉故也。

六月壬午，以盐铁判官、虞部郎中樊若水为荆湖转运使。封故燕国长公主次女高氏为“延昌县主”。

乙酉，麟州防御使李克文来朝，以唐僖宗赐其祖夏州节度使拓跋思恭铁券、朱书御札上献。上因观其词旨卑替，谓宰相曰：“朕尝览韩偓《金銮记》，见昭宗在凤翔，梁太祖引兵至城下，号为迎驾，其实胁君。韩偓为翰林学士，昭宗欲见之，而为中官所隔，潜匿伺便，方遂一见，可为叹息也。”宋琪对曰：“唐末乱离，诸侯强盛，其势固不能久。”以雷德骧、石熙古、魏庠、朱昂、李惟清、祖吉、雷有终、陈白、杨缵、李琯、崔迈、吕备，分为两浙、峡路、京西、西川、淮南、荆湖、江南、广南、河北、陕西转运使。

丁亥，诏曰：“朕以不明，托于兆人之上，夙夜祇惕，罔敢怠荒。赖九庙储祥，上玄垂祐，万务粗治，于今九年。而数日前，〔迅〕雷之中，烈火遽作，既延哭于正殿，盖示谴于眇躬。祇畏震惊，罔敢宁处。上天警戒，必有由然。岂非烛理之所未明，赏罚之所未当，物情尚多于壅塞，政理未洽于和平，生灵未息于疮痍狱，讼未除于枉桡，赋调未得均一，贤良多所沦滞，有一于此，足败政经。载深馭朽之诚，思启纳言之路。卿等列于有位，咸切致君，所宜各竭忠规，共申谏议，扬朝廷之阙失，陈时务之否臧，当悉乃心，必期无隐，朕将亲览，用自儆焉。”

己丑，登闻院引对妇人李氏自陈云：“无儿息，身且病，恐一旦溘死，家业委弃，欲未死有所属。”上因谓宰相曰：“此妇人，数日前朕已令开封府依所欲裁置之，今复来告诉，称其父已被繫矣，此是小事，何用禁繫？京辇之下，尚敢如此，天下至广，冤枉可知。朕恨不能遍阅天下狱讼，亲行决断。每见大理寺断遣诸州刑狱，多为其中小有未尽，即却之。今国家封疆阔远，来往动是五、七千里，再令勘覆，转是淹延。今后，宜令遣使分诣诸州，令周细详酌，如不干人命，使至便与断，决不须重勘。”琪等曰：“谨奉诏。”即日，分遣殿中侍御史李范等八人往两浙、淮南、西川、广南，录问刑狱。以金部员外郎奚屿为京东转运使。

壬辰，诏曰：“朕恤念蒸民，忧勤庶政，每令询访，以导郁堙。苟规益之有闻，岂卑高之是间。应天下幕职州县官，俱负吏才，咸通时务，其或知民俗利害，政令否臧，并许于本州附传置以闻。如所言有可收采，必行旌赏；或无所取，亦不加罪。”先是，转运使及知州、通判皆得上书言事，而州县官属则否，上虑下情壅塞，故降是诏。

乙未，镇安军节度使、守中书令石守信薨。守信，字德贞。开封没仪人，事周祖为小校，累迁散指挥使。从世宗征并、汾，遇敌于高平，以战疾力，迁亲卫左第一军都指挥使。师还，授铁骑左厢都指挥使。显德二年从征淮南，以功迁铁骑、控鹤四厢都指挥使，领嘉州防御使。从平关南，以功授殿前都虞侯。未几，迁殿前都指挥使领，江州防御使。恭帝嗣位，授滑州刺史、充义成军节度使，军职如故。太祖陈桥之入也，时守信宿卫内庭，闻变，登左掖门，严兵设备，闭关以守。

太祖之典亲军官署在门内，太后居其中，太祖未至，先遣帐下亲信楚昭辅问太后起居。及昭辅至，守信启关纳之，太祖甚德之。践祚，改领宋州刺史、归德军节度使。从平李筠，以功加同平章事。李重进据淮扬叛，命守信充行营招讨使、兼知扬州行府事。维扬平，改郢州刺史、天平军节度使，兼侍卫亲军马步军都指挥使。上章乞解军职，诏许之，以其子保吉尚许国公主，加兼侍中。上嗣位，加兼中书令，移河南尹、西京留守，进位守中书令。从征幽州，以失律降授随州刺史、崇信军节度使、兼中书令。寻进封卫国公。久之，改陈州刺史、镇安军节度使、复守中书令。至是薨，年五十七，诏辍视朝三日，赠尚书令，追封卫王，谥曰武烈。守信累任节镇，惟以聚敛为事，性贪嗇，积财巨亿万计。雅信尚释教，多所施舍，在西京造崇德佛寺，役人辇运瓦木，督责既急，而所给不充其佣直，人皆苦之。

丙申，上出粟、豆数十本以示近臣，因谓枢密使〔王〕（人）显等曰：“今年风雨虽调，犹虑禾稼未得丰茂，昨令往京城四面百里外取得粟、豆凡数种，皆长数尺，大是好田。”喜形于色。是日，草泽上书言时政，引对，词甚狂勃，上不之罪，慰谕以遣之。因谓宰相曰：“往昔帝王，多以尊极自居，词气严厉，左右无敢贡一言者。朕虽布衣言事，必温颜以待之，只如每与卿等款曲商榷时事。盖欲通上下之情，无有所隐。”宋琪等顿首称谢。

丁酉，宰相以东封在近，导驾仪卫，合取进止，上曰：此行盖为告谢天地，与苍生祈福，广陈仪卫，即是劳扰，非朕意也，但一如令、式。

己亥，舒州言：“五色云见于灵仙观上。”

庚子，诏曰：“先是，六年十二月辛卯，诏书：‘应诸道刑狱，长吏每五日一录问。’今天下亦几于治矣，然颇为烦劳，特示改更，永期遵守。今后，宜令十日一录问，杖罪以下，便可依理踈决。”

壬寅，诏曰：“朕以眇躬，嗣膺丕构，涉道犹浅，布〔政〕（衣）未孚，中心惕然，常所祇惧。赖昊天垂祐，黔首小康，丰年屡臻，四鄙不耸。岂敢暇逸，自谓宴安？昨者文武群臣，泊手耆耄，盈廷抗疏，连袂扣阍，谓乎治平之时，请举升中之礼。顾惟凉德，岂可克堪？而陈请再三，因以俞，允载惟盛，礼终觉愧。况封禅之仪，废之已久，百司祇奉，办集尤难；万姓供输，劳优斯甚。且令停罢，更俟后期。国门之南，圆丘素备，宜辍登封之礼，聿修柴燎之诚。朕以十一月二十一日，有事于南郊。凡尔臣僚，当体兹意。”

甲辰，以定国军节度使宋偓为右卫上将军。

丁未，免开封府推官张雍，左、右军巡判官韩昭裔、宋延煦，博州博平县令杨处仁等。左右军巡使殿直庞则、王业并降充殿前承旨，医人陈士良等并决杖流海岛。初，寡妇刘氏有奸状，恐事露，遂成忧悸之疾，复惧其子陈告，遂令侍婢陈诉，称其子王元吉寘毒于食中，因病，但未死，事下开封府右军巡，按之未得实状，移于左军巡。推典受刘氏赇，掠治元吉，遂自诬。及开封府引问，元吉始以实对。府中不能决，又移于司录司。尽捕两军巡元推胥吏，按问之，稍见诬构之迹。而府中以追捕者众，遂列状引见。上以元吉药母事状暗昧，令免死，决徒。开封府将杖元吉，元吉大呼曰：“元吉苟受刑，府中官吏岂得了乎？顷尽，還元吉所用货赂。”府中不敢决，因问元吉行赂之状，元吉曆指之，遂具元吉词款上言，元吉复令妻张氏挝登闻鼓以闻。上览之，临轩顾问，悉见其冤枉之状。亟令中使收捕元推官吏，送御史台再鞠之。至是，狱具、引见，自雍而下，上一一亲问，咸伏其辜。特诏免元吉，而有是命。先是，元吉繫左军巡，为狱吏繫缚，榜笞备诸，惨毒不胜，其苦至是。上复令缚狱吏，以其法偿之。狱吏宛转号叫，惟求速死。

上曰：“汝犹不胜其苦，他人能胜之乎？”及解其缚，两手不能举，良久方复。上因谓宰相曰：“刑狱中有如此惨酷，京城尚如此，况僻远乎？”遂以右谏议大夫辛仲甫代刘保勲知开封府，保勲、泊、判官李继凝各夺一季俸。郴州刺史张再兴责授右率府副，率坐知雄州日以粗率自任，失政故也。

秋七月己酉朔，以保平军节度使杜审进为右卫上将军。

壬子，改乾元殿为朝元殿，文明殿为文德殿，丹鳳门为乾元门。

癸丑，诏曰：“先是，郊禋五使，权用他司印，宜令有司，各铸印以赐之。”

乙卯，诏曰：“御史府：宪令所繫，狱讼攸归；凡在官聯，皆为要剧。所宜恪谨，以承重任，强毅以肃群奸。岂可因循，恣成縱弛？如闻臺中鞠狱，多是委之有司，御史但雍容端坐，養高自重而已。故令群吏为奸，无所不至，岂所谓徇公求理、钦恤慎重之意乎？今后凡有刑狱，当推御史，并顷躬亲讯问，研究词情，不得信任胥吏。仍令中丞及知杂御史，常加纠举。”

庚申，诏改匭院为登闻院，东延恩匭为崇仁检，南招谏匭为思谏检，西申冤匭为申明检，北通玄匭为招贤检。

壬戌，中元节，上幸建隆观，谓宰相曰：“道门以冲澹为本，夫道者，天地万物之祖，而其教终微，岂主之者非其人乎？”移幸太平兴国寺。回，御东华门楼观灯，赐从官饮，夜分而罢。

己巳，兵部侍郎致仕程羽卒。羽字冲远，深州陆泽人，少好学，能属文，晋天福八年擢进士第，解褐为郢州阳穀县主簿。秩满，授易、定、祁等州观察支使，历虞乡、新都、醴泉三县令，皆有政绩。开宝中，选为两使判官。及引对，太祖询其时事，称旨，擢为著作郎、出知兴州。逾年，改知兴元府，诏归阙。上方尹京邑，羽以本官充开封府判官。羽性淳厚，莅事恪谨，上亦以长者待之。及上嗣位，拜给事中、赐金紫，知开封府。未几，出知成都府，为政寬简，蜀人便之。入朝，拜礼部侍郎，充文明殿学士。以年老艰于步履，求罢近职，拜兵部侍郎。请告百日，假满，上章乞致仕。诏从之，仍给全俸。至是卒，年七十三。上嗟悼数四，官给葬事，赠礼部尚书。

癸酉，有司言：“有挟私逼胁人致死者，请以抵罪。”上曰：“朕读唐书，见李义府逼毕正义死狱中，然小人之情何所不至，亦不足怪也。”令论如律。归州言：“古玉虚观内天尊以木为骨，其木忽生枝叶。”

乙亥，以前朔州观察使、驸马都尉石保吉起复云麾将军、新州刺史、威塞军节度使；以前如京使石保兴起复云麾将军、领顺州团练使。

太宗皇帝实录卷第四十三

起雍熙五年九月，尽端拱元年二月

雍熙五年春正月己未朔上不受朝以将有事于耕藉也群臣诣阁拜表称贺庚申御制喜雪五言二十韵诗赐宰相李昉等令属和癸亥土犯建星甲子成都府言部内比歲不稔穀价翔贵请发公廩賑糴以济贫民从之乙丑以监察御史宋镐为右拾遗直史馆进贺雪诗称旨故也丙寅以大理评事王禹偁为右拾遗罗处约为著作郎并直史馆戊辰澶州言黄河清二百里癸酉上宿斋于朝元殿甲戌次东郊是夜宿于斋室乙亥日未明三刻上亲飨神农氏坛以后稷氏配焉次诣耕藉田位行三推之礼有司板奏礼毕上顾谓侍臣曰朕志在劝农恨不能终千亩岂止以三推为限乎遂耕数十步侍臣固请乃止回御丹鳳楼下制曰王者握圖御极膺骏命于上玄务穡劝农利烝民于率土朕嗣临大宝十有三年每师勤俭之风用洽雍熙之化民惟邦本虽无怠于辑寧食乃民天顾未隆于教道是用举累朝之坠典藉千亩于近郊载陟青坛躬展事神之礼三推黛耜式隆敦本之风岂惟备郊庙之粢盛抑亦励烝黎之播殖万国骏奔而述职千官星拱以在庭望宫阙城社之尊睹声明文物之盛岂予寡昧独荷于鸿休思与华夷同均于大庆宜革纪年之号仍覃作解之恩可大赦天下改雍熙五年为端拱元年自正月十七日昧爽已前应天下罪人除犯十恶及官典犯正枉法赃至杀人者不赦外其余罪无轻重咸赦除之内外马步军诸将卒等第加赏给文武臣僚并与加恩诸贬降官未量移者与量移已量移者与复资已复资者与叙用除名免官人等所司具名以闻天下人户雍熙三年已前系欠夏秋税物并与除放应军民为盗亡命山泽百日不来陈首复罪如初民有年七十已上见为家长耆年宿德为乡里所宗者宜令本州具名以闻当赐爵一级旧制天子孟春吉亥飨先农于东郊亲耕藉田自东晋南迁此礼废坠唐贞观中太宗始藉于千亩至元和五年宪宗以河朔师旅之后物力凋耗将行而复止自是历五代二百餘祀不复举行上以承平既久乃诏有司参酌典故行三推之礼所以示劝农而兴坠典也丙子上赋东郊藉田五七言诗各一首赐侍臣丁丑诏改晋州洪崖庙为栖真观从本州之请也庚辰诏郡国不得以司

理参军兼莅他职先是成都府言以司理参军承府县之阙故降诏以止之辛巳右屯卫上将军伊审微卒审微太原人同光中父延瑰随孟知祥入蜀知祥僭即伪位以女妻延瑰历嘉眉二州刺史审微以父历任伪蜀州刺史通奏使同平章事武泰宁江两军节度使蜀平归朝为邠州刺史静难军节度使移镇延安开宝末微为右屯卫上将军至是卒年七十五先是审微与王昭逵俱为伪通奏使掌机务即枢密使之任也孟昶国事无大小一以咨之常自以康济经略为己任會王师入境审微首奉降表詣军前昭逵时统精卒数万出城拒战闻王师之至弃军走匿东川城仓中后数日擒获时人笑之壬午南康军判官朱覃弃市覃淮西俚人也幼寒贱始为人厮役及长窃弄笔砚冒为士流游科場凡数年止以利口持人长短士君子颇患之洎策名从政其志益横与大理评事王悦素不协悦掌建昌县酒榷告覃部内为奸赃鞫得实故抵于法殿中侍御史龚颖编历代年纪为二圖来上优诏褒之癸未上幸玉津园习射张乐 赐从官宴饮乙酉诏曰典狱之官理资于钦恤经国之道政尚于宽仁庶洽时雍用刑期措如闻酷吏颇恣凶威虑致陷于平人必有伤于和气宜行禁止以示哀矜应天下刑狱罪人内有合行讯问者只得一依律令其鼠弹箠非理残忍之类并禁之先是诸处狱吏撈掠罪人以绳接缚其手系于足指用挺叩其绳则痛入骨髓谓之鼠弹箠上闻颇悼其酷故下 诏禁之 二月辛卯诏辍视朝以皇舅静江军节度使杜审进夫人张氏卒故也癸巳以殿中侍御史柴成务为户部员外郎直史馆甲午宴中书门下文武常参官翰林学士节度观察防御团练使刺史诸军校百夫长已上诸州进奉使外国蕃客于大明殿乙未诏曰补阙拾遗位居谏省荣践清华之列是为献纳之臣朝廷之得失须论刑政之烦苛必举眷兹职业寄任非轻上则辅佐大臣次则公卿庶尹历朝迭任何莫由斯苟或但务因循止思愼默忠言说议寂寥无闻殊乖申讽之规曷副建官之意宜更旧号特立新名庶明立制之文咸励匪躬之节其左右补阙宜改为左右司谏左右拾遗宜改为左右正言上欲令谏官 修其职业故改其官号特降是诏以申明之己亥诏免瀛州部民租调三年徭役五年以其再遭犬戎蹂躪故也庚子制曰端揆崇资文昌右相盖非贤而不授谅出綍以惟公告示具僚举兹明命中书侍郎兼工部尚书同中书门下平章事李昉岩廊旧德文学

名儒踐台閣之通班素高問望處鈞衡之大任从展
謨猷謙和秉君子之風純懿擅吉人之美今者輟从
三事總彼六卿董齊喉舌之官載光北斗領袖搢紳
之列首冠南宮用資鎮俗之清規式表尊賢之茂典
禮異適遵于表著眷懷別示于股肱佩服渥恩優游
名器恭踐厥位往惟欽哉可尚書右仆射同日制曰
尊賢养老上古格言念旧錄勲前王令典而况再登
廊廟三秉節旄始終不易于純誠出入咸膺于大用
爰疇茂德用降徽章山南東道節度襄州管内觀察
處置等使檢校太師兼侍中許國公趙普大昂儲祥
維嵩挺秀翊天飛之景運名冠王公蘊台輔之嘉謨
功書簡冊早从黃閣荐拥高牙隆中盡偃于仁風岷
首賡歌于善政加以心惟許國道在安民封章屢納
于忠言致理率陳于正道佑予涼德繫乃宗臣朕所
以卜在會朝委之論道彝倫未叙將俟于緝熙庶政
缺然伫期于寅亮是以輟从藩輔復踐岩廊加帝保
之崇資冠鸞台之旧列咨上公而詢庶政弥切倚毗
昌洪業以永丕圖更資光輔可守太保兼侍中昭文
館大學士又制曰天道无私日月星辰助其照皇王
不宰股肱輔弼代其功所以端拱仰成垂衣致理建
千年之景運追三代之令猷其有業茂經綸才推謹
厚參大政而載罹寒暑秉純誠而无替初終宜推爰
立之恩式副至公之選朝散大夫給事中參知政事
上柱國賜紫金魚袋呂蒙正四氣均和五行鍾秀蘊
濟時之明略輔之以溫恭挺命代之宏材守之以淵
默凡膺歷試畢振芳猷公忠推社稷之臣凝重見廟
堂之器眷茲大体从郁具瞻爰資作砺之功用正秉
鈞之任崇階駁貴列爵增封兼司太史之書載踐地
官之秩尔宜周旋庶政佐佑眇躬緩茲宵旰之憂翊
我隆平之運同底于道豈不美欤可光祿大夫中書
侍郎兼戶部尚書同中書門下平章事監修國史又
以開封尹陳王元僖進封許王韓王〈真宗旧名〉進封襄王
冀王元份進封越王益王元杰加食邑一千戶武勝
軍節度使許王錢俶進封鄧王樞密使王显加檢校
太傅給事中參知政事辛仲甫加戶部侍郎樞密副
使左諫議大夫趙昌言加工部侍郎以樞密副使左
諫議大夫王沔為戶部侍郎參知政事以御史中丞
張宏為工部侍郎充樞密副使甲辰詔陞建州為建
寧軍節度以武寧軍節度使曹彬加檢校太尉安遠

军节度使钱惟浚进封谯国公彰国军节度使驸马都尉王承衍改贝州刺史永清军节度使威塞军节度使驸马都尉石保吉改沧州刺史横海军节度使殿前都虞候张训领归义军节度使傅潜领昭化军节度使并充殿前副都指挥使侍卫马军都虞候李继隆领保顺军节度使充侍卫马军都指挥使侍卫步军都虞候戴兴领振武军节度使充侍卫步军都指挥使慎州观察使驸马都尉魏咸信为相州刺史彰德军节度使以左卫上将军张永德为密州刺史安化军节度使乙巳以内客省使杨守一为宣徽北院使签署枢密院事丙午诏郡国民有艰食处听发公廩赈济之丁未以刑部尚书宋琪为吏部尚书礼部侍郎李至为刑部侍郎翰林学士中书舍人宋白为礼部侍郎司封郎中知制诰贾黄中为中书舍人祠部员外郎知制诰苏易简为本曹郎中知制诰并依前翰林学士以右补阙知制诰李沆为职方员外郎王化基为驾部员外郎宋湜为库部员外郎起居舍人知制诰田锡为兵部员外郎知制诰户部员外郎知制诰胡旦为司封员外郎并依前知制诰以左神武大将军顺州刺史王继升领本州团练使徐文武官进秩有差以乙亥赦书加恩故也戊申以右谏议大夫郭贇雷德骧并为工部侍郎以度支使张洎为盐铁使户部使魏平为度支使度支副使李惟清为右谏议大夫户部使以刑部员外郎陈象舆董俨屯田员外郎雷有终并为本曹郎中分充盐铁度支户部副使己酉以职方郎中韩丕兵部郎中杨徽之并为左谏议大夫司勳郎中罗延吉为右谏议大夫以屯田员外郎杨砺为库部员外郎充襄王府记室参军庚戌以皇子元偓为左卫上将军元偁为右卫上将军以皇侄孙惟吉为左骁卫大将军惟正为右骁卫大将军惟叙为左武卫将军惟和为右武卫将军惟宪为左屯卫将军惟能为右屯卫将军壬子兴化军言甘露降工部侍郎同知京朝官考课雷德骧上表求致政先是德骧与赵普不协普再入相制下之日德骧方立朝手不觉坠笏遂拜章求退避普之仇也因请于便殿见上具陈所以上勉谕从之谓曰第去朕终当保全卿勿以为虑乃恳乞罢知京朝官考课以奉朝请从之仍赐白金三千两以慰其心癸丑以右散骑常侍徐铉为左散骑常侍以皇城使蓟州刺史王延德领本州团练使乙卯右千牛卫

上将军李崇矩卒崇矩字守则上党人也幼孤贫长而谨厚为乡里所称晋天福之乱汉祖起自并汾师次上党史洪肇时为先锋军帅闻崇矩之名召署亲吏汉祖践阼以洪肇为侍卫亲军都指挥使徼巡阙下洪肇性残忍好杀军民横罹其毒者不可胜计至于屠李嵩之家皆洪肇苏逢吉之僞也时人冤之左右惧其凶威亦稍稍遁去惟崇矩事之益谨迨洪肇被诛卒免其祸周祖初有天下素与洪肇厚善访求亲旧将恤其孤得崇矩而悉以委之崇矩尝主洪肇之家籍由是尽获史氏之财产以付洪肇弟福周祖闻而嘉之乃命隶于世宗帐下世宗嗣位擢为供奉官是年河东刘崇入寇从征败崇于高平以功转供备库副使俄迁作坊使恭帝嗣位以崇矩判四方馆事太祖受禅李筠叛上党率并寇鼓行而南太祖患之命崇矩为行营护军率兵戍河阳以御其冲与石守信高怀德罗彦瑰同破筠众于碾子谷乃表请太祖亲征泽潞平以功授右监门卫大将军充三司使累迁至枢密使时赵普为相崇矩在宥密皆数年分秉大柄因以女妻普之子承宗厚相交结太祖闻之颇怒會门下客郑伸上书发其阴事开宝五年出为镇国军节度使六年迫入朝授左卫大将军上即位出为岭南道都巡检使未幾遣使赍诏就移为琼崖儋万四州都巡检使所部兵士惮于从行有逗挠之色崇矩乃尽以车服器用金帛凡数百万分给之众遂感悅乐为其用累年海上无恙受代归阙迁右千牛卫上将军寻被病请长告至是卒年六十五辍视朝一日诏赠太尉谥曰元靖崇矩性纯厚寡言而志敦信义好黄白之术尤重佛法以始事洪肇迨乎通贵见洪肇之子孙必厚礼而优济之或闻有学黄白之道者必自遠邀之至以师礼待之虽知其诈而犹以为神仙之士卒无恨悔在官凡得俸入除朝夕伏腊费用外多输于僧室故身死之日家无厚积焉

太宗皇帝实录卷第四十三

太宗皇帝实录卷第七十九

起至道二年九月，尽十二月

己巳，以单州刺史扬琼为本州防御使充灵庆路兵马副部署壬申苏州言虎夜入福山寨食戍卒四人

癸酉，六宅使富州刺史张茂宗卒茂宗魏郡繁水人举进士及第解褐大理评事累迁太子中允直御史府先是洛阳官市赤罽吏第其价为三第民有诉其罔上者事下河南府逾年不能决命茂宗驰传视之茂宗径诣出赤罽处按验罽皆同色无他异吏伏罪俄兼盐铁推官上命欲儒士领内职迁茂宗为六宅副使改西京作坊使知潭州民甚便之善待过客取名誉使车出其境以美声闻于上者日以充斥征为六宅使富州刺史知河南府移知梓州绵州又知兴元府至是卒年四十九上颇嗟悼之

戊寅，右仆射宋琪薨琪字淑宝范阳蓟人少好学问与同郡室昉齐名晋天福中戎虏猖炽每岁开贡藉琪举伪进士中第署寿安王侍读幽帅赵延寿恐其陷极塞辟为从事会戎虏猾夏随延寿至京师延寿以其子赞领河中节制署琪为记室周广顺中府罢调补澶州观城未几世宗征淮南起赞为排阵使复辟琪在幕府及镇庐江表为观察判官部有冤狱琪辩之活三人死命制加朝散大夫国初赞连移镇寿阳延安皆表为从事召拜左补阙开封府推官上时领府尹礼遇甚厚坐与宰相赵普厚善多遊其门上恶之白太祖出琪知陇州移阆州改护国军节度判官上即位召拜太子洗马选太常丞征归将大用为卢多逊所沮改都官郎中出知广州将行求对于便殿上以藩邸旧僚不欲使之遽去因留不遣改兵部郎中判三司句院廷辩事忤旨责授本曹员外郎通判开封府事先是开封府未尝置通判通判之召自琪始也俄拜右谏议大夫同判三司迁左谏议大夫参知政事时李昉参知政事昉已任工部尚书欲令琪居昉上即日拜刑部尚书参知政事如故赵普出镇与昉同平章事会郊祀加门下侍郎昭文馆大学士琪尝遣柴禹锡白上请卢多逊旧宅上恶琪无鍾离意委珠之操又素好诙谐无大臣体因罢为刑部尚书琪将罢前数日晨至侍漏舍有异鸟大于鸛集琪之坐左右驱不去至是罢人皆异之端拱初上亲耕藉田以旧相进位吏部尚书琪生长戎虏习知边事会北戎入寇下诏博访有位琪献《平戎十策》上嘉纳之事未果行颇为识者所许拜

右仆射月给真俸上以其衰老特诏五日一朝数月被病作多幸老民自叙以见志又口占遗表数百字而卒年八十诏辍视朝两日赠司空谥惠安琪学术素浅颇口谐捷给在使府前后三十年周知人情伪尤通明吏术在相位每百执事谒见有所求请必面折之以是人用胥怨诏剑南峡路诸州民家先蓄藏兵器限诏到百日悉上送官敢匿而不以闻发觉者斩

己卯，夏绥延行营上言两路合势破贼于乌池斩首五千级生擒二千余人获米募军主吃啰指挥使等二十七人马二千匹兵器铠甲数万群臣称贺先是上怒继迁亲部分诸将攻讨李继隆自环州丁罕自庆州范廷召自延州王超自夏州张守恩自麟州凡五路率兵抵平夏上皆先授以成算师已有期会继隆遣其弟继和驰驿上言路回远欲自清冈峡直抵继迁巢穴不及援灵武上怒召继和于便殿诘之曰汝兄如此必败吾事矣因手扎数幅切责继隆命引进使周莹赍诣军前督之莹至而继隆已便宜发兵不俟报而与丁罕兵合行十数日不见虜引军还张守恩见虜不击率兵归本部独王超范廷召至乌白池与贼遇大小数十战虽颇克捷而诸将失期士卒困乏终不能擒贼焉

庚辰，诏陈州管内先是节度使石守信在任日科属县民输药物十二种非风土所产者并除之甲申贬会州观察使环庆路副部署田绍斌为右监门卫率府副率虢州安置先是白守荣马绍忠受诏与大将皇甫继明护送军粮绍斌自灵州率兵迎援次浦洛河会继明卒守荣等后期一日至适为继迁所围守荣等欲击之绍斌曰蕃贼轻佻勿弃輜重与战但按辔结阵徐行守荣等忿曰我不受节度若但率兵来迎尔勿预吾事绍斌因率所部去輜重四五里继迁初望见绍斌旌旗不敢击守荣等自欲邀奇功遂与战败丁夫相惊溃走蹂践死者无数绍斌振旅徐还所部不亡失一人上初嘉之未几李继隆遣护军冯讷入奏言浦洛河之败绍斌握精卒登陇上顾望不救自言灵武非我不能守欲规图方面有异志上大怒曰是尝背太原来投今又首鼠两端真贼臣也立遣使捕繫诏狱鞫问而有是命

癸巳，以右武卫将军韦韬为本卫大将军致仕韬年八十馀病足不任序班为御史台所纠上以其老病怜之故有是命

甲午，诏翰林学士、两省五品、尚书省四品已上各赐一子出身，以“寿宁节”特推

恩故也。以都官郎中黄夷简直秘阁。夷简上言：“浙右人无预馆阁之职者”，因自陈故。吴越王僚佐尝劝王入朝，词甚恳激，上怜之，故有是命。以右谏议大夫雷有终知并州。

乙未，诏建州岁贡龙凤茶。先是，研茶丁夫悉剃去须发，自今但幅巾、洗涤手爪，给新净衣，吏敢违者论其罪。

丙申，诏废衢州银冶建。三泉县为大安军，以西县隶焉。

丁酉，以天长军降为县，依旧隶扬州，六合县隶建安军。

戊戌，朔，有司言诸州职事令录判司簿尉等共阙一千七百馀员望令京东江浙荆湖漳泉等处州县官有两员处不更置有三员处发遣一员赴阙从之

庚子，殿前都指挥使、夏绥银等州都部署王超征阙。

辛丑，环、庆、丹、延、晋、绛州、京兆府皆上言：“前月十九日，地昼夜十二震。”

甲辰，寿宁节，群臣上寿，退赴佛寺宴饮。诏令皇太子赴会。

辛亥，月有食之

己未，以池州新铸钱监为永丰监庚申宴中书门下翰林学士文武常参官节度观察防御团练使刺史诸军校百夫长已上诸州进奉使外国蕃客于含光殿

辛酉，以主客员外郎周浣为京东转运副使

壬戌，以泰宁军节度使兼侍中张永德为左卫上将军永德遣亲吏市言茶兴贩规利阑出徼外买羊犒将卒为转运使王嗣宗所纠故罢其节镇而有是命虢州刺史刘宇卒宇范阳卢龙人受虏署易州刺史车驾北征宇开门迎王师归朝累受郡印至是来朝卒于京师年七十五宇伉健有勇力以弧矢鞍马自任虽老犹矍铄不衰往往以骑射为乐为政宽易郡民甚爱之甲子免京东转运使工部郎中郭异坐前知越州用法失入故也诏并三司句院为一以工部员外郎刘以诗戒之易简恐惧每入直不敢复饮酒或休假在私第宾客候之常醉矣以致其死

上曰易简果以酒败可惜也雅善笔札好谈谄所著文房四谱及文集二十卷行于世

丙午，处州言稻再熟。命宰相及群臣分于京城诸寺观祠庙祷雪。

甲寅，雨雪，近臣称贺。

乙卯，以给事中温仲舒为户部侍郎左谏议大夫李惟清为给事中

丙辰，以工部郎中直集贤院胡旦守本官知制诰右赞善大夫宋贻序上表乞终丧纪从之贻序故右仆射琪之次子琪卒上悉起诸子授以官廩给之至是贻序上言故不夺其志

丁巳，命工部郎中知制诰胡旦序立于冯起之上故事知制诰先入者居上不繫于官次至是冯起任祠部郎中故命旦居其上非常例也

戊午，诏曰自今州县官部内流民及亡失租调计之一者并书下考东上阁门使安忠卒忠洛阳人事上于藩邸形质魁岸书才记姓名上即位授供奉官累迁至东上阁门使俄迁左龙武大将军判右金吾街仗事忠泣诉于上以环卫之任在外朝不得侍左右愿复旧职上笑曰大将军三品显官汝终不知朝廷表著因从其请出护洪吉七州屯兵至是卒年六十四

是歲，天下户四百五十七万四千二百五十七。

太宗皇帝实录卷第八十

起至道三年正月，尽山陵

丙寅，朔，上不受朝，群臣诣阁门拜表称贺。

丁卯、癸酉，并辍视朝，以孝章皇后启櫨并发引故也。群臣诣阁奉慰。

丙子，以户部侍郎温中舒礼部侍郎王化基并守本官参知政事给事中李惟清同知枢密院事以给事中参知政事张洎为刑部侍郎

己卯，上元节，京城张灯。上幸乾元门楼，宴从官，夜分而罢。

戊子，孝章皇后神主还京宰相率百官拜迎于顺天门外

己丑，刑部侍郎张洎卒。洎，滁州人，少有俊才博通坟典李景日举进士及第解褐上元尉迁校书郎景长子燕王冀卒有司谥武宣洎献议驳正词理精当擢拜监察御史自以论事称旨遂率意弹击不避权贵大臣游简言等共嫉之会景避地豫章留其子煜居守即共荐洎掌煜记室不得从未几景卒于豫章煜袭位擢为工部员外郎试知制诰满岁为礼部员外郎知制诰累迁中书舍人清辉殿学士参预机密恩宠第一洎故字师黯煜令字偕仁常以字呼之清辉殿在后苑中煜爱之不令旦夕离左右故授以内殿之职中外之务一以咨之每兄弟宴饮宫中作妓乐洎独得预宫城东北隅赐以大第为写书万馀卷别创书堂煜自科著之常至其第召见妻子慰抚赐予甚厚洎尤好建议每所规画煜未即行必称疾不起煜以手扎开释之始复视事及王师围城逾年城危甚洎每劝煜勿降广言符命指引玄象无变金汤之固未易取也旦夕当引退愿勿忧又言一旦有不虞当先死社稷既而城陷洎携妻子及金玉重宝自便门入止宫中与枢密使陈乔同升阁将俱死既至乔自经气绝洎乃下见煜曰臣与乔同掌机务今日国亡当俱死念主入朝谁辩明主所以不死尔将有以报也归朝太祖召见责之曰汝教煜不降使至今日因出帛书示之乃王师围城煜遣洎草征上江救兵蜡丸中诏书也洎顿首请罪曰臣之所为也犬各吠非其主此其一尔他尚多今得死臣之分也词色不变太祖初欲杀之及是喜拜太子中允上即位以文雅选直舍人院未几

使高丽复命改户部员外郎出知相贝二州颇简慢
部内不治转运使田锡言其状征还洎求见廷辩
上以其儒生不复责以吏事诏不问以本官知译经
院改兵部员外郎礼部户部二郎中选为太仆少卿
拜右谏议大夫判大理寺俄充史馆修撰判集贤院事
上令以儒行篇刻于版赐近臣及新及第贡举人洎上表称述敷引前代以媚
上上以其该博命丞相奖谕数月擢拜中书舍人充翰林学士洎性便
佞能伺候人主意博涉经史多知典故每上有所
著述及赐近臣诗什洎必上表广征引以将顺其美
与苏易简同在翰林数月尤不协及易简秉政洎旦
夕攻之既而易简罢以洎为给事中参知政事与寇
準同列先是準知吏部选事洎掌考功为吏部官属
準年少新进气锐思欲老儒附已以自大洎夙夜坐
曹视事每冠带候準于省门揖而退不交一谈準益
重之因召与语洎捷给善持论多为準规画準心伏遂兄事之极口夸洎于
上渐欲进用又知其在江表日多谗毁良善李煜杀中书舍人潘佑洎尝预谋
心疑之待诏尹熙古吴郢皆江东人洎常善待之
上一夕召熙古等侍书禁中因问以佑得罪故熙古
言煜忿佑谏说太直尔非洎也自是洗然遂擢用盖
準推挽之也既同秉大政準亦忌之洎奉事準愈谨
政事一决于準洎无所参预专修时政记甘言諛词以自媚于
上会议灵州事不称旨恐惧欲自固权宠上已嫉準专恣恩宠衰替洎虑一旦同罢免因
奏事大言寇準退后多诽谤上準但色变不敢自辩
上由是大恶準旬日罢未几洎被病家居满百日力疾请对方拜踏于
上前明日表解职优诏不允后月馀改刑部侍郎罢知政事捧诏呜咽疾遂亟
后十馀日卒年六十四上闻之轸悼特赠本曹尚
书赙襚赠增加等以其二子皆为六品正员官。洎风
仪洒落文彩清丽兼通禅寂虚无之理终日清谈亹
亹可听尤险诋好攻人之短旧事李煜及煜归朝甚
贫洎犹丐索之煜以银觥面器与洎洎怒不得金者
时潘慎修掌煜记室洎疑慎修教煜素与慎修善自
是亦稍踈之煜子仲寓雅好蒲博饮宴洎因切谏之
仲寓谢过后数月人有言仲寓蒲博如故洎遂与之
绝及仲寓死郢州归葬京师洎亦不赴吊与张洎议
事不协遂为仇隙始父事洎既而不拜尤善事黄门
宦官在翰林日引唐故事奏内供奉官蓝敏贞为翰
林学士使内侍裴愈副之上覽奏谓曰此唐室弊
政疑貳大臣处处以中人监之朕方恢复古道安肯
踵此覆辙卿言过也洎惭而退洎自江东归朝廷故

旧无登其门者性鄙吝虽亲戚无所及常与故散骑常侍徐铉厚善心重之因议事小不协遂绝然手写铉文章访求其笔札藏于篋笥甚于珍玩此其异也庚寅以都官郎中沈继宗为淮南转运使工部郎中知制诰胡旦兼史馆修撰辛卯以侍卫亲军马步军都虞候傅潜为延州路兵马都部署殿前都虞候王昭逵为灵州路兵马都部署西京作坊使石普为关右河西巡捡户部使张鉴调发陕西诸州军粮工部郎中知制诰张秉祠部郎中知制诰冯起翰林侍读起居舍人吕文仲推节催督之

丙申，朔，以许州司马卢文翰为工部员外郎同勾当陕西转运事丁酉孝章皇后祔别庙群臣皆诣阁奉慰庚子灵州行营言败李继迁万馀众斩首二千级获鞍马铠甲数千计继迁单骑遁走群臣称贺

辛丑，上不豫，止于便殿决事。

甲辰，诏曰朕获主万邦于兹二纪圉圉之际专务于尽心肖翘之微常忧其失所矧畿甸之富庶而輶轂之浩穰方春阳和之时品物鬯茂禁繫犹众狴犴未空虽多辟之所招在好生而斯切议狱缓死宜顺于天常有眚灾聿遵于时令自至道三年二月九日已前应京畿系囚死罪并降从流流已下并放戊午诏文武百官并于崇政殿起居自皇太子亲王及诸军校分为七班。先是，上不豫不御前殿犹孜孜视政事延见群臣无有厌怠至是以文武班列众多久坐罢倦而有是诏

壬戌，大食、宾同朮国各遣使朝贡。以右谏议大夫雷有终为给事中知并州。是月，上不豫，皇太子、诸王及文武群臣、宦内诸司使、诸军将校各于佛寺斋居会祈福。

乙丑，朔，永兴军节度使田重进卒重进范阳人形质奇伟有武力周显德中应募为卒太祖时统禁军以重进隶麾下从征淮南有战功又从太祖北征会陈桥军变重进以翊戴功迁御马军使累迁控鹤指挥使领灊州刺史上即位擢为天武左厢都指挥使领灊州团练使改侍卫步军都虞候豐州观察使从攻太原部攻城南面会刘继元降录其功依前领豐州刺史充天德军节度使侍卫步军都指挥使未几河大决滑州房村发卒数万人命重进护其役既而河塞改邠州刺史静难军节度使领军职如故王师北征以重进为飞狐路兵马都部署大

破虏擒其将大鹏翼监军马赞副将何万通并契丹渤海三千余人斩首数千级获鞍马铠甲数万追北四十余里下飞狐灵丘数城乘胜取蔚州会曹彬不利重进以所部护送蔚州官吏士庶凯旋以功改涇州刺史彰化军节度使充侍卫亲军马步军都虞候出为定州兵马都部署端拱初改真定尹成德军节度使移京兆尹永兴军度使至是卒年六十九辍视朝两日赠侍中重进扑愿不知书上在藩邸时日怜其忠勇尝令给以酒炙重进不肯受使者云晋王以赐汝汝安敢拒重进曰我但知有陛下不知晋主是何人也卒不受上知而嘉其质直无他肠故终始委遇又以长寿县主适其子守信以宠之丙寅以慎州观察使桑赞知贝州考功员外郎张素为荆湖南路转运使丁卯以工部侍郎张雍知京兆府占城国遣使朝贡庚午以怀州团练副使宋太初为工部郎中知梓州癸酉环庆路行营言护送輜重已入灵州

丁亥，出麦豆穗数十以示近臣上曰今歲多稼豐茂数倍常年引手而言其苗过膝桑柘甚盛蚕绩必有大所获喜动颜色

壬辰，不视朝。

癸巳，追班于万歲殿，宣制曰：“朕闻两曜丽天，不能逃亏昊之数；四时成歲，无以逾代谢之期。知冥运之有终乃达人之大观朕以凉德君临万邦二纪于兹庶政咸乂爰从春首忧劳遘灾虽药石之载加奈沉绵而愈剧以至大渐弗寤弗兴皇太子克茂温文夙彰孝爰自处前星之位弥光主鬯之贤嗣守丕图必符昌运宜于枢前即皇帝位尔其任贤去邪克遵于往诰布德施惠深念于蒸民更赖中外羣臣文武多士一心協佐共致雍熙诸军赏给并取嗣君处分表纪以日易月山陵制度务从俭约应在外臣僚不得擅离治所只于本处举哀於戏有生必死品物之大端送往事居前哲之明训，克构鸿业，吾无恨焉！”是日，上崩于万歲殿，太子即皇帝位。

甲午，小殓。

丁酉，百官成服遂大殓。翰林学士承旨吏部侍郎宋白上议曰臣闻明一合道曰皇德象天地曰帝聰明文思行也尧舜禹汤谥也王者膺图受曆应天顺人美盛德而试诸难腾英声而节一惠生有尊号终受大名垂诸简编如揭日月伏惟大行皇帝允恭克让豁達神武千年诞圣彤云紫气之祥五行鍾秀日角龙颜之

表纯孝因心奉 宣祖而尊严父雍睦悌长翊 太
祖以肇兴王始者姬室下衰梁王在位讴歌狱讼去 周归
宋王于出征帝出言迈三灵改卜百姓与能
陈桥有切谏之言京邑无攸攘之患市不易肆遂登
皇极佐圣之功大也乃荒鲁邦乃建元侯内總熊罴
肃清禁卫龙潜邸第晦九五之迹鳳德尹京洽亿兆
之心洎奄有四海为天下君大宝曰位其命惟新
改元太平符守文之代于铄军政叶下武之时应运
之期至也蕞尔汾晋结援林胡逆节乱常两朝三 纪劳人动众坚不可拔
帝赫斯怒定议亲征矢石 齐攻金汤不守折铁易于摧枯渠魁倏已衔璧与民
更始惠如春阳本封 晋王终定厥土受天之命光
也漳泉入覲混同文轨抗越献地一统寰区无思不
服无遠弗届占城于闐之封大食宾同之国猷琛奉
贄府无虚月白鸚紫鹄之异神麟丹鳳之灵嘉禾连
理史不绝书中孚之信及也经纬天地克定祸乱政
之大者必躬亲之高台讲武临轩选士英儒瞻闻之
鸿博骨腾肉飞之俊杰天下英雄落吾彀中外之峻
级待以清华不十数年有登廊庙而定疆场者知臣
之精鉴也幽有鬼神明有礼乐坠典聿修无文咸秩
五展南郊之仪一议东封之礼藉田劝农御楼肆赦
释老之教崇奉为先名山大川灵踪胜境仁祠仙宇
经之营之致恭之诚广也求贤审官化民成俗为政
以德惟刑恤哉置详刑之曹下考课之令营蒯不弃
涇渭分流时无遗才吏皆守法兴废继绝矜孤振寡
视民如子使无盜乎水旱思艰食为忧幽遐念吁天
无所增加使额勤恤人隐纳隍之言遠也俯仰山谷
详定隐沦修史氏之职改班秩之称著治化之书贞
观之风也纪他山之石开元之事也弧矢以威天下
善射通神药石以救齐人仙方填委乐正雅颂无相
夺伦幸太学以谈经召儒臣而侍读卑宫室则断雕
为朴减尊称则法天崇道开理捡以登闻升便殿而
崇政立储定社稷之本清心希大庭之妙治世之规
备也在宥天下二十有二年王泽深矣机务详矣臣
下之归尊至矣黎甿之受赐多矣越书契以无伦尽
帝王之能事还淳复古如指诸掌泥金检玉方卜近 期而鼎成龙至
圣驾上仙万方縞素九域遏密下 臣奉诏拟议徽烈丕扬耿光追惟古始巢燧之际载
籍未备神黄已还声明有章若乃兼商周之质文總
唐汉之雄盛乃圣乃神乃武乃文叙全功与全德实
映后而辉前也旁稽礼文恭按謚典应变无方不疾

而速得不谓之神乎施为于民财成万物得不谓之
圣乎万邦作宪帝德广运得不谓之文乎保犬定功
奄有九域得不谓之武乎太法太初前志谓太上立
德宗以宗德礼经有宗祀配天惟千龄应运之君为 百代不迁之主请上尊谥曰
神功圣德文武皇帝 庙号 太宗

己未，以 大行皇帝谥册告于南郊。

庚申，告于万歳殿，册曰：“哀子嗣皇帝臣谨再拜稽
首言曰臣闻天地之大莫能形容神圣之功无所拟
议然则圆方之象必取于强名尧舜之称盖从乎节 惠伏惟
大行皇帝承天立极执象临人其生也感 大电之精其出也应真人之运声身为其律度道德
作其藩篱若日月之明无幽不烛如江海之量无
大不容爰自曆在躬大横叶繇旧疆来复尽有江吴
戎辂亲征旋平汾晋皆出于睿断遣以圣谋繫象
不能蹟其微鬼神不能窺其奥是以總宇宙于掌握
得英雄于穀中宅诸夏以制四维坐明堂而覲群后
髥首贯胸之类接武于藁街景星甘露之祥叠书于
册府在宥天下二十年当是时也灵台偃伯象阙悬
书瓯脱弥严县道率化物无疵疢歲有顺成积粟
腐于太仓豐财溢乎内帑材官剑客皆六郡之豪分
阃登坛尽万人之敌自历代已来未有若斯之盛者
也于是赐民酺饮展礼藉田被袞冕于泰坛躬俎豆
于清庙幸成均而视学屡睹横经纪延阁以垂文尝
紆睿思若乃生知多艺天纵聰明洒草隶之华得琴
棋之绝擅弧矢之妙洞玄释之微皆作世楷模出人
意表岂力学之能及实振古之未闻大哉邈乎不可
得而论矣然犹日慎一日虽休勿休温颜以尽下情
虚已以延说议一夫不获纳隍之虑每深万邦有罪
在予之责尤切至若省去徽号汉后之不言圣也杜
绝田猎玄元之虑发狂也屏藻井之饰夏禹之卑宫
念黄沙之枉成汤之祝网也有一于此犹谓之圣况
兼是数者乎方将鸣銮东夏检玉介丘而天祸忽临
仙驾长往群臣咽绝愿赎以身万姓克穷如丧厥考
顾惟寡昧虔奉丕图荒疚哀迷惧不克荷今因山俯
毕同轨咸臻敢荐大名爰稽载籍询博士礼官之公
议叶宰衡庶尹之輿情定谥于南郊得请于 上帝
谨遣摄太尉右僕射兼门下侍郎平章事臣吕端奉 宝册谨上尊谥曰：
‘神功圣德文武皇帝’，庙号‘太宗’。”